

Respublikamizdagi moddiy-madaniy meros
obyektlari soni 8210 tani tashkil etadi. Shundan:

Davlat mulki:
7827 ta

Xususiy mulk:
383 ta

YOSHLAR OVOZI

**BIZ – KELAJAK
BUNYODKORIMIZ!**

Ijtimoiy-siyosiy, iqtisodiy,
adabiy-badiiy
gazeta

64 (16517)
2022-yil, 14-sentabr
chorshanba

[/yoshlarovozi](#)

[/yoshlarovozi](#)

[/yoshlarovozi.uz](#)

Gazeta 1925-yildan chiqa boshlagan

Kun mavzusi
3-bet

10 ming talabaga
transport yetarlimi?

Yoshlar yetakchisi
4-bet

Ishning ko'zini
biladigan yetakchi

Sening tengdoshing
6-bet

Sarvinoz 10 ta
til o'rgandi




Foto: Anvar TO'YCHIEV

5 TASHABBUS OLIMPIADASI BOSHLANDI: HAYAJONLI LAHZALAR VA G'ALABA ZAVQI OLDINDA

Yangi mavsumda musobaqa tashkilotchi va mas'ullari ham yoshlarga
o'rnak bo'lish istagida o'yinlarda ishtirok etmoqda.

batafsil
5-betda

SHHT: TALQINLAR TURLICHA, UMUMIY MAQSAD MUSHTARAK



Qadimdan turli millat vakillari uchun tarixiy muloqot maydoni, madaniyatlar ko'prigi va yaxshi qo'shnichilikni mustahkamlash maskani sifatida nom qozongan Samarqand shahrida Shanxay hamkorlik tashkilotiga a'zo mamlakatlarda davlat rahbarlari kengashining navbatdagi uchrashuvi bo'lib o'tadi. O'zbekiston raisligida SHHT doirasida qanday natijalarga erishildi?

Tashkilotning maqsad va vazifalari haqida turlicha talqinlar tarqatilmoqda. Aslida SHHTning ustuvor maqsad va vazifalari nimalardan iborat?

Maqolada shular haqida fikr yuritamiz.

Ruhshunoslar inson juda ko'p hollarda faqat o'zi xohlagan narsani ko'rishini isbotlashgan. Voqea va hodisalarni ongli tushunishimizdan tashqarida bo'lgan ongosti hodisasi atrofimizdagi reallikni aslida emas, balki o'zimiz uchun kerakli va qulay tarzda qabul qilishga majburlaydi.

Deyl Karnegining "Bezovtalikdan qanday qutulib yashash mumkin?" kitobida keltirilgan misrada aytilganidek:

"Garchi bitta derazadan qarar, Birov balchiq, birovdan yulduzni ko'rar..."

Shu kunlarda Shanxay hamkorlik tashkilotining yurtimizda bo'lib o'tadigan sammiti ko'pchilikning diqqat-e'tiborida bo'lib turibdi. Ko'ina va hamisha navqiron Samarqand a'zo mamlakatlarda davlat rahbarlari kengashining navbatdagi majlisiga mezbonlik qiladi. Ushbu tadbir SHHT yetakchilarining 2019-yildan buyon birinchi yuzma-yuz uchrashuvi bo'ladigan va O'zbekistonning tashkilotdagi raisligiga yakun yasaydi.

Shu munosabat bilan ko'plab xorijiy ommaviy axborot vositalarida SHHTning O'zbekiston raisligida o'tgan so'nggi bir yil mobaynida erishilgan ijobiy natijalar va, umuman, ushbu tashkilotning keyingi rivojlanish istiqbollari haqida qator maqolalar e'lon qilinmoqda. Bunday tahlillarda mamlakatimizning SHHTga

raisligi yurtimizda keyingi olti yilda amalga oshirib kelinayotgan faol va ochiq tashqi siyosatning mantiqiy davomi bo'lgani, asosiy e'tibor savdo-iqtisodiy aloqalarni mustahkamlash, transport-kommunikatsiya imkoniyatlarini kengaytirish, "yashil" iqtisodiyotni rivojlantirish, kambag'allikni qisqartirish kabi ustuvor yo'nalishlarga qaratilgan e'tirof etilmoqda.

O'zbekiston Respublikasining SHHTga raisligi

davrida 80 dan ortiq yirik tadbirlar amalga oshirilgan. Jumladan, davlatimiz rahbari tomonidan ilgari surilgan tashabbuslarni amalga oshirish maqsadida 14 ta yangi konseptual hujjat loyihasi ishlab chiqilgan. SHHT doirasidagi hamkorlik sohalarini mazmunan boyitish va institutsional kengaytirishga qaratilgan bu hujjatlar qatorida transport bog'liqligini rivojlantirish bo'yicha SHHT strategiyasi, Mintaqalararo savdoni rivojlantirish rejasi, Infratuzilmani rivojlantirish dasturi, "SHHT Ezgu niyat elchisi" institutini tashkil etish kabi loyihalarni alohida ta'kidlash zarur.

Aksariyat tahlilchilarning fikrlariga ko'ra, O'zbekiston ilgari surgan tashabbuslar faqat bunyodkorlik va hamkorlik ruhida bo'lib, barcha tomonlarning manfaatlariga to'la javob beradi hamda ularni hayotga tatbiq qilish mexanizmlari puxta ishlab chiqilgan. Samarqand shahrida bo'lib o'tadigan davlat rahbarlari kengashining yig'ilishida ham tashkilot doirasidagi ko'p qirrali hamkorlikni yangi sifat bosqichiga olib chiqishga qaratilgan hujjatlar to'plami imzolaniishi kutilmoqda.

Lekin ayrim tahlilchilar Shanxay hamkorlik tashkilotini g'arb davlatlari va NATOga qarshi turadigan kuch sifatida talqin qilishga harakat qilmoqda va bu holat hozirgi go'yoki "bir qutb"li bo'lgan dunyoning "ko'p qutb"liga aylanishiga olib keladi, deyishmoqda.

Masalan, yirik bir axborot agentligi tomonidan publitsist deb ko'rsatilgan KDvinskiy SHHT istiqbollari quyidagicha ko'radi: "Bugun G'arb bosimi ostida bo'lgan davlatlar atlantik tuzilmalarga qarshi zarba berish uchun yagona iqtisodiy makon va harbiy blokka birlashishlari kerak. Buning eng ma'qul yo'li - SHHT doirasida birlashishdir". Bu targ'ibot-chining ta'kidlashicha, Amerikadan boshqariladigan oldingi dunyo parchalanishi aniq bo'lib, uning o'rnini Yevrosiyosiy makonidagi eng qudratli tuzilma bo'lgan SHHT egallari ekan.

"SHHT nafaqat Shimoliy atlantika shartnomasi tashkiloti - NATOga, balki g'arb davlatlari qarashiga asoslangan dunyo tartiblariga ham dadil qarshi bormoqda", - deydi Rossiya Xalqaro munosabatlarni kengashi direktori AKortunov.

Hatto ayrim rasmiylar ham SHHT "g'arb tomonidan tashkilotga qaratilgan bir qutbli dunyo tartiblariga qarshi turishga qodir bo'lgan kam sonli tashkilotlardan bir" deyishgacha bormoqda.

Shu ma'noda Shanxay hamkorlik tashkiloti bosh kotibi Chjan

Min SHHTga a'zo davlatlar rahbarlarining

Samarqandda

bo'lib o'tadigan

uchrashuvi o'ldidan tashkilot

doirasida turli bloklarga

qo'shilmaslik, har qanday

uchinchi tomonga qarshi

harakat qilmaslik

tamoyillariga qat'iy

rioya qilinishi lozimligini

eslatib o'tgani bejiz emas.

Aslida ham tashkilotning asosiy dasturi hisoblanuvchi "Shanxay hamkorlik tashkiloti xartiyasi"da ishtirokchi davlatlarning BMT nizomi maqsad va tamoyillariga, xalqaro huquqning xalqaro tinchlik, xavfsizlik va davlatlar o'rtasida do'stona munosabatlarni rivojlantirishga qaratilgan umume'tirof etilgan me'yorlariga sodiqligi alohida ta'kidlab o'tilgan.

Ushbu hujjatda, shuningdek, tashkilotning maqsad va vazifalari, faoliyatining asosiy tamoyillari

ochiq-oydin ifodalangan. Ishtirokchi davlatlar o'rtasida o'zaro ishonch, do'stlik va yaxshi qo'shnichilikka asoslangan hamkorlikni rivojlantirish, mintaqada tinchlik va barqarorlikni mustahkamlash, terrorizm, separatizm va ekstremizmning turli ko'rinishlari, jinoyatchilikka qarshi birgalikda kurashish shular jumlasidandir.

Shanxay hamkorlik tashkiloti xartiyasida davlatlarning mustaqilligi, hududiy yaxlitligi va chegaralar daxisizligi, boshqa davlatlarning ichki ishlariga aralashmaslik, xalqaro munosabatlarda kuch ishlatmaslik yoki kuch bilan tahdid qilmaslik, kelishmovchiliklarni tinch yo'l bilan hal qilish singari xalqaro huquqning umume'tirof etilgan normalari o'z aksini topgan.

Hujjatda SHHTning boshqa davlatlar va xalqaro tashkilotlarga qarshi qaratilmagani tamoyili ta'kidlangan.


Shanxay hamkorlik tashkiloti ulkan salohiyatga ega bo'lgan hamda xalqaro maydonida nufuzi ortib borayotgan tuzilma sifatida o'z faoliyatini turli tahlilchilarning istak va talqinlari emas, balki o'zining huquqiy poydevori bo'lgan ta'sis hujjatlarida belgilangan tamoyillar asosida olib boradi.

Ta'kidlab o'tish kerakki, O'zbekistonning Shanxay hamkorlik tashkiloti doirasidagi hamkorlikning ustuvor yo'nalishlari yuzasidan munosabati har doim ochiq-oydin ifodalanib kelgan. Xususan, Prezident Shavkat Mirziyoyev tashkilotga a'zo davlatlar rahbarlari kengashining o'tgan yil 18-sentabrda Dushanbeda bo'lib o'tgan yig'ilishidagi ma'ruzasida mazkur tashkilotning uchinchi davlatlar va boshqa xalqaro tashkilotlarga qarshi qaratilmaslik tamoyiliga amal qilish, mintaqaviy aloqalarni kuchaytirish, do'stlik, yaxshi qo'shnichilik va o'zaro ishonch muhitini mustahkamlash singari vazifalar ustuvorligini saqlash zarurligini ta'kidlagan edi.

O'zbekiston ushbu tashkilotning bloklarga qo'shilmaslik maqomi va uning faoliyatini barqaror rivojlanish maqsadlariga qaratish maqsadga muvofiq, deb hisoblaydi.

Anvar EMINOV,

Adliya vazirligi huzuridagi Huquqiy siyosat tadqiqot instituti xodimi
O'ZA



10 MING TALABA

YOTOQXONA BILAN TA'MINLANSA, O'QISHGA QAYSI JAMOAT TRANSPORTIDA QATNAYDI?

Shahruza SATTOROVA,

"Yoshlar ovozi" muxbiri



Poytaxtda talabalarni turar joy bilan ta'minlash maqsadida Yangi hayot tumanidagi "Tashkent Index" savdo-ishlab chiqarish majmuasi hududida bo'sh turgan **10 ming o'rinli bino talabalar yotoqxonasiga aylantirilmoqda**. Shahar hokimi o'rinbosari Durdona Rahimovaning aytishicha, talabalar yotoqxonadan tashqari, dars qilish uchun o'quv xonalari, oshxonalar va 1,5 kilometr uzoqlikdagi metro bekatigacha bepul avtobuslarda borib kelish imkoniyatiga ega bo'ladi.

Ayni paytdagi dolzarb masalaga yechim topish, albatta, yaxshi. Ammo buning ortidan boshqa bir muammoning kelib chiqishi og'riqlidir. 10 ming talaba bir paytda darsga borishi kerak, tabiiyki, ular uchun qulay transport vositasi metro. So'nggi yillarda poytaxt aholisi nafaqat ishga borish va qaytish vaqtida, balki kunning boshqa paytlarida ham tirbandlik, jamoat transportining sifatsiz xizmati, behuda vaqt sarfi kabi bir qator muammolarga duch kelmoqda. Shunday ham Sergeli tumani yo'llaridagi tirbandlik favqulodda vaziyat emas, balki kunda odamlarni qiynaydigan muammo. Oyoq qo'yishga joy topib bo'lmaydigan jamoat transportlari yana 10 ming talabaga qanday xizmat ko'rsata oladi?!

Bu masala yuzasidan jiddiyroq bosh qotirish kerak, negaki shaxsiy avtomobillar va yo'lovchi-

lar soni tobora ortib borayotgani bois transport masalasi Toshkent shahrining eng og'riqli muammolaridan biriga aylandi. So'nggi 10 yilda poytaxtda avtomobillar soni ikki baravardan ziyodroqqa oshgani, boz ustiga jamoat transporti yo'nalish tarmoqlari o'tgan asrning 80-yillarida tuzilgani, ammo shu vaqtga qadar mukammal tarzda qayta ko'rib chiqilmagani, oqibatda shahar jamoat transporti tizimida jiddiy muammolar yig'ilib qolgan vaziyatni tobora murakkablashtirmoqda.

Ayni paytda Toshkent shahrida avtobuslar bo'yicha **140 ta**, yo'nalishli taksilar bo'yicha **67 ta**, metropolitenda **4 ta** yo'nalish mavjud. Avtobuslarda kuniga o'rtaacha **400 ming**, metropolitenda **380-400 ming** kishi manziliga yetkaziladi. Poytaxtga kunlik kirib-chiqishlarni inobatga olsak, jamoat transportini rivojlantirish naqadar muhim ekanligini anglash qiyin emas. Yo'llarda mashinalar qancha ko'p bo'lsa, bu shunchalik tirbandlikni keltirib chiqaradi. Yo'llar tirbandligidagi asosiy ulushni shaxsiy transport vositalari tashkil qilgan ekan, buning

oldini olish yo'llaridan biri - jamoat transportini ko'paytirish. Ammo poytaxtda aholining kamida 90 foizi harakatlanadigan jamoat transportlariga e'tibor berilmayapti.

2016-yil 2-may kuni Markaziy Osiyodagi eng qadimiy va eng yirik yengil relsli yo'l tizimi - Toshkent tramvayi tarixga kirdi. Rasmiylar buni avtotransportlar sonining doimiy ko'payishi va tramvay yo'nalishlarining samarasiz ishlashi bilan izohlashdi. Ko'p sonli avtomobillar uchun yo'llarni yanada kengaytirishni xohlaganlari uchungina 115 yillik tarixga ega butun boshli jamoat transporti tizimi buzib tashlanishini nima deb izohlash mumkin?

Dunyoning boshqa davlatlarida shaharlar yengil temir yo'l transporti (LRT) qurishga va shaharlarga tramvay olib kelishga harakat qilayotgan bir paytda eng ekologik toza va eng tejamkor transport turini nobud qilish va uni Toshkent ko'chalaridan olib tashlash tarix kitoblarimizga eng katta xatolarimizdan biri sifatida kirgan bo'lsa ajab emas.

Afsuski, uzoq yillar davomida ko'chalarda avtomobillar sonining ortishi va tirbandliklar muammosini bartaraf etish chorasi sifatida hukumat va shahar hokimligi mutasaddilari ko'proq yo'llar qurish va ularning o'tkazish imkoniyatini oshirish haqida o'ylamoqda. Ammo yo'l o'tkazuvchanligini oshirish uchun kengroq yo'llar qurish samarali yechim emasligi hamamizga ma'lum.



BARCHA YO'LLAR "PROBKA"GA OLIB BORADI

Ertaga soat 10 da majlis bor, vaqtlilroq uxlash kerak. Axir Yangiyo'l tumanining bir chekkasidan poytaxtning qoq yuragiga "shest sekund" da yetib borib bo'larmidi?!

Ertalab 06:00 da uyg'onib, supur-sidir qilib, choy ichib, soatga qarasam - 7:40. Yo'lga chiqdim. Metrogacha taksida boraman, "Olmazor" metro bekatigacha 5 ming so'mga olib borib qo'yishadi. Omadim kelib, sovutkichi bor, oynasi qoraytirilgan mashinaga chiqib qolibman. Yashavor, yigirma minutlik yo'lda bemalol uxlab olsa bo'ladi, o'tob qizdirmaydi - biznes

klass, "Naushnik"ni quloqqa ilib, chamasi 15 daqiqa o'tgach ko'zimni ochsam, hali shaharga kirish tugul, "Bo'zsuv" ko'prigiga ham yetmabmiz. Yo'l tirband, haydovchi telefonida kino ko'rib o'tiribdi...

Endi nima bo'ladi? Majlisga vaqtida bormaganim uchun kamida daki eshitaman yoki "hayfsan" berishadi. Keyin bu oyligimga ta'sir qiladi. Oyligim kamaygach, IELTSga borolmayman, IELTS ololmaganim uchun magistraturaga kirolmayman, magistraturaga kirolmasam... Yo'q, unda qishloqqa erga berib yuborishadi, unaqada jurnalistikani tashlashimga to'g'ri keladi...

Shunday xavotir bilan ikki yarim soat deganda tirbandlikdan chiqadi. 20 daqiqalik yo'lni ikki yarim soatda bosib o'tdik! Soat 10, majlis boshlangan bo'lsa kerak. Mening kovushimni to'g'ri qilib qo'yish haqida ham topshiriq bo'lgandir. Metroga tushib, ishga borganimcha soat 12 bo'lay debdi. Qisib, qimtinib ishga kirsam, hamma o'z xonasida xotirjam ishlab o'tiribdi. Majlis bo'ldimi, desam: yo'q, - deyishdi, - rahbarimiz "probka"da qolib ketibdi...

Ha, hazilomuz aytilgan bu voqea ko'pchilikning boshidan o'tgan.

ISHNING KO‘ZINI BILADIGAN YETAKCHI

Iqbol PARDAYEVA,
"Yoshlar ovozi" muxbiri

Mahalladagi yetakchilarning faoliyati bilan tanishar ekanmiz, ular yoshlar bandligini ta'minlash bilan birga, hududdagi muammolarni ham hal etayotganiga guvoh bo'lyapmiz. Bugungi qahramonimiz bir yoshni ham daromadli qilib, ham shu yo'l bilan mahalla ahlining uzog'ini yaqinlashtirib, ko'pchilikning duosini oldi.

Gap shundaki, Kasbi tumanidagi "Yuksalish" mahallasi tarkibiga 4 ta bir-biridan 2-3 kilometr uzoqlikda joylashgan kichik qishloqlar kiradi. Mahalladagi yagona bog'cha esa ko'pchilik aholi uchun uzoqlik qilar edi. Mahalla yetakchisi taklifi bilan eng chekka hududda yana bir bog'cha ish boshladi.

– Mahallamiz tarkibidagi qishloqlar bir-biridan uzoqda joylashgani bois bolalar ham bog'chaga kelib

o'rtog'i va yana 5 nafar yosh doimiy ish o'miga ega bo'ldi.

Mahalla yetakchisi avvaldan parrandachilik, baliqchilik bilan shug'ullanib kelganidan mahalladagi ishsiz yoshlarga ham parrandachilik va baliqchilik bilan shug'ullanib ko'rishni taklif qilmoqda. Bu borada yetakchi har bir yangi ish boshlagan yoshlarga shaxsan o'zi maslahat bermoqda. Aytishicha, buning uchun katta xarajat talab etilmaydi.

– Baliqchi tadbirkorlar bilan mahalladagi ishsiz yoshlarga trening o'tkazib, soha sirlarini o'rgatdik, –


Diyorjon ATAVULLAYEV,
"Yuksalish" mahallasi yoshlar yetakchisi



na daromad olish mumkin. Mahallamizda 10 nafardan ziyod yoshlar parrandachilik bilan shug'ullanib, oyiga o'rtacha 5 million so'mdan daromad qilyapti. Yana 30 nafardan ortiq yoshlar o'z xonadonida issiqxona qurib, dehqonchilikdan daromad olmoqda.

Mahalla yetakchisi yoshlarning bo'sh vaqtini mazmunli tashkil etishda "5 tashabbus olimpiadasi"ni eng yaxshi yechim deb biladi. Shu boisdan olimpiadaning har bir turiga mahalla yoshlarining qatnashishiga alohida e'tibor qaratmoqda. Olimpiadaning ikkinchi mavsumiga tayyorgarlik ko'rayotgan mahalla yoshlari birinchi mavsumda ham munosib ishtirok etib, yaxshi natijalarga erishgan edi. Jumladan, Obod ko'chasining yoshlari "Zukko kitobxon" tanlovida sektor, tuman, viloyat bosqichida g'oliblikni qo'lga kiritib, 2 million so'mdan, jami 12 million so'm pul mukofoti olishdi. Bu gal ular respublikada g'olib bo'lish niyatida.

topganman. Buning uchun issiqxona qurish kerak. Issiqxona uchun 5 million so'm xarajat ketadi. Hovuz uchun 1,5 million so'm mablag' yetarli. 1 million so'mga baliq lichinkasini, 1 million so'mlik ozuqa olsak, jami 8,5 million so'm bo'ladi. Biz 8,5 million so'm kredit ajratsak, 5 kun ichida baliqchi tadbirkorlar ish boshlashi mumkin. Ayni paytda mahallamizda 20 nafarga yaqin yoshlar o'z xonadonida baliqchilik bilan shug'ullanyapti. Ularning har biri oyiga 3-4 million so'm sof foyda ko'rmoqda. Mahallada juda qiyin ahvolda yashayotgan ijtimoiy himoyaga muhtoj yoshlarga ta'minotchi bilan gaplashib, qisqa fursatda baliqxona tashkil etib berdik. Parrandachilikdan ham yaxshigi-




deydi yoshlar yetakchisi Diyorjon Atavullayev. – Ko'pchilik joy muammo bo'ladi yoki ko'p xarajat qilinadi deb o'ylaydi. Lekin oson yechimini



ketishga qiynalardi, – deydi Kasbi tumanidagi "Yuksalish" mahallasi yoshlar yetakchisi Diyorjon Atavullayev. – Shuning uchun yonimga ish so'rab kelgan Azamat Bobojonovga o'z uyidan xususiy bog'cha ochish taklifini berdim. Birga reja tuzib, o'ziga tegishli bo'sh turgan obyektni bog'chaga aylantirishga qaror qilidik. Uni jihozlash uchun 33 million so'm imtiyozli kredit ajratildi. Hozir 50 o'rinni bog'chada Azamatning o'zi, turmush

Yoshlar daftari

G'UZORLIK YETAKCHILAR BUXORODA



G'uzor tumanidagi 51 ta mahalla yoshlar yetakchilarining Buxoro viloyatiga sayohati tashkil etildi. Yoshlar yetakchilari tuman hokimi o'rinbosari A.Jovliyev va Yoshlar ishlari agentligi G'uzor tumani bo'limi xodimlari hamrohligida Bahouddin Naqshbandiy maqbarasi va boshqa muqaddas qadamjolarni ziyorat qildi.

DEHQONCHILIKNI TANLADIM



Akmaljon AMINJONOV,
Samarqand tumanidagi "Qo'shmasjid" mahallasi fuqarosi

Yoshim 20 da. Oilamizda biroz qiyinchilik bo'lgani uchun mahallamiz yetakchisi Obidjon Nurillayevdan yordam so'rab chiqdim. U menga har xil ishlarni taklif qildi. Bobom ham, otam ham dehqonchilik bilan shug'ullangani, mening ham yoshligimdan bu sohada tushuncham borligi sabab dehqonchilikni tanladim.

Yetakchimiz shu kuni meni "Yoshlar daftari"ga ro'yxatga oldi. Men esa auktsion orqali 20 sotix yerni 10 yil muddatga foydalanishga oldim. Bu yerga bodring ekdim, shu kunlarda hosilni yig'ib, sotmoqchi bo'lib turibman. Yaqinda uyimizda to'y bo'ladi. Niyatim shu to'yga o'z hissamni qo'shib, ota-onamga yordam qilish.

Mening atrofimdagi barcha dehqonlar mahallamiz yoshlari. Ular ham mendek yer olib, loviya, mosh, jo'xori kabi ekinlar ekib, hosilini yig'ish arafasida.

SHAXSIY NAMUNA VA DA'VAT OLIMPIADAGA O'ZGACHA RUH BERMOQDA

Hududlarda "Besh tashabbus olimpiadasi"ning ikkinchi mavsumida qatnashish istagini bildirgan yoshlar bahslarga kirishdi. Dastlabki kungi bahslardan ko'rinib turibdiki, musobaqada ishtirok etmoqchi bo'lganlar ilk mavsumdagidan sezilarli darajada ko'p.

Olimpiadaning ilk kunida stol tennis bahslari boshlandi. Bahslarni turli joylarda stol tennis ustalari ochib berishdi. Taniqli sportchilar yoshlarga omad tiladi. Stol tennis ustalarga havas qilgan yoshlar ulardan motivatsiya oldi.

Shaxmat-shashka musobaqalari ikkinchi turdan o'rin olgan bo'lib, bahslar qizg'in tarzda boshlandi. Avvalgi mavsumdan farqli ravishda bu mavsumda oldindan yaqqol favoritni taxmin qilish imkonsiz. Hamma birdek tayyorlangan. Hatto professional murabbiylarni jalb etgan mahallalarda ham guvoh bo'ldik. Ta'kidlash joizki, bu yil shaxmatchilarimizning yuqori ko'rsatkichlari sabab shaxmat musobaqalarida ishtirok etayotganlar ko'pchilikni tashkil etmoqda.

"Besh tashabbus olimpiadasi" birinchi mavsumida g'oliblikni qo'lga kiritgan ishtirokchilar ikkinchi mavsumda o'z shogirdlari bilan qatnashayotganiga guvoh bo'lyapmiz. Xususan, birinchi mavsumda shashka sport turi bo'yicha g'oliblikni qo'lga kiritgan andijonlik Ahrorbek Mamatursunov shashka musobaqalarida o'z mahallasidan 20 kishilik jamoa shakllantirgan va



o'zi boshchiligida musobaqalarda dona surmoqda. Bu ham olimpiada qamrovi kengaygani hamda qiziqishning ortganidan dalolatdir.

Bundan tashqari, yangi mavsumda musobaqa tashkilotchi va mas'ullari ham yoshlarga o'rnak bo'lish istagida joylarga borib, yoshlar bilan o'yinlarda ishtirok etmoqda. Jumladan, Yoshlar ishlari agentligi Besh tashabbus loyihalari muvofiqlashtirish boshqarmasi boshlig'i Indira Xoldarova ham ishtirokchilarga shaxsiy namuna ko'rsatib, Guliston shahrida yoshlar bilan birga stol tennisida bellashdi.



Foto: Anvar TO'YCHIYEV

– "Besh tashabbus olimpiadasi" muhiti meni o'ziga tortdi, – deydi Indira Xoldarova. – Yoshlarning ishtiyoqini ko'rib, o'zim ham qanday qilib bahslarga kirishib ketganimni sezmay qoldim. Ishtirokchilarning mahorati, qiziqishi menda katta taassurot qoldirdi.

"Besh tashabbus olimpiadasi" endi boshlandi. Oldinda bizni katta voqea va hodisalar kutib tu-

ribdi. Olimpiadaning ikkinchi mavsumi ham cheksiz his-hayajon va g'alaba nashidasini tuhfa etishiga ishonamiz. Birgalikda kuzatamiz!

Muhammadshukur
MUHAMMADJONOV,
"Yoshlar ovozi" muxbiri

Komila HAMROYEVA, O'ZMU talabasi

SARDORLAR SAYLOVI: MUNOSIBLAR SARALANDI!



Har o'quv yilining sentabr oyi davomida an'anaviy tarzda "Tengdoshga tengdosh" tamoyili asosida faol bo'lmagan yoshlar bilan tizimli ishlar tashkil etish, ularda notiqlik mahoratini takomillashtirish hamda "Kamalak" bolalar tashkiloti a'zolari safini kengaytirish maqsadida Sardorlar saylovi o'tkazib kelinadi.

Joriy yilning 7-10-sentabr kunlari respublikamizning barcha umumta'lim maktablarida "Kamalak" va Yoshlar ittifoqi sardorlarini saylash jaryonlari bo'lib o'tadi. Xususan, Toshkent shahrining 145, 223, 227, 114, 112 va 123-umumta'lim maktablarida sinf sardorlari saylovini shaffof o'tkazish maqsadida namunalik sinf sardorlari saylovi hamda yoshlar bilan ochiq muloqot tashkil etildi. Muloqot davomida yoshlarning taklif va g'oyalari tinglandi, e'tibordan chetda qolayotgan loyihalarni amalga oshirishga kelishildi hamda yoshlar sardorlik faoliyatida duch kelayotgan muammolarni tizimli hal etish masalasi ko'rib chiqildi.

– Boshlang'ich tashkilotlarda har tomonlama faol, o'z fikri va qat'iy fuqarolik pozitsiyasiga ega, tashabbuskor va fidoyi yoshlar ko'p. Ularni kashf etish, taklif va g'oyalarni qo'llab-quvvatlash, duch kelayotgan muammolarini bartaraf etish hamda ular bilan doimiy ochiq muloqot qilish oldimizda turgan eng ustuvor vazifaga aylanishi kerak, – deydi Toshkent shahar "Kamalak" bolalar tashkiloti koordinatori Azizbek Ochilboyev.

Sardorlik ulkan mas'uliyat bilan birga, o'ziga xos majburiyat ham yuklaydi. Sardor o'z xulqi, bilimi, kiyinish va muomala madaniyati bilan boshqa yoshlarga o'rnak bo'lishi zarur.

"INKLYUZIV O'ZBEKISTON"




Yoshlar ishlari agentligi tashabbusi bilan joriy yilning sentabr oyida yurtimizning tarixiy va diqqatga sazovor go'shalari – Samarqand, Buxoro, Xiva va Shahrisabz shaharlari bo'ylab nogironligi bo'lgan yoshlar uchun "Inklyuziv O'zbekiston" sayohati tashkil etilmoqda.

Loyiha doirasida Buxoro va Navoiy viloyatidagi 100 nafar nogiron yoshlar uchun ilk sayohat ochiq osmon ostidagi muzey – qadimiy Xiva shahriga bo'ldi. Ular shaharning diqqatga sazovor joylarini aylandi. Xivaning qadimiy binolari, sayyohlikni rivojlantirish uchun qilinayotgan ishlar haqida ma'lumotlar berildi. Jami 213 ta ustunga tayanib turgan tarixiy obida – Juma masjidi ham ishtirokchilarda katta qiziqish uyg'otdi.

Mashhura NASRIDINOVA,
"Yoshlar ovozi" muxbiri

“OTASINING ERKASI” BO'LISHNI ISTAMAGAN YIGIT



2022/2023-

o'quv yili ham boshlandi. Kimdir orzusidagi ta'lim muassasiga kirib, talaba bo'ldi, kimlarningdir rejaları yana bir yil ortga surildi. Shahrimiz ko'chalari esa ko'zi chaq nab turgan birinchi bosqich talabalariga to'ldi. Ayrim yoshlar o'z yurtimizda talabalik baxtiga erishgan bo'lsa, chet eldagi oliy ta'lim muassasalariga qabul qilingan bilimdonlarimiz ham talaygina.

Shahribonu RAHMATOVA
suhbatlashdi

Universitetda o'z yo'nalishim uchun kerak bo'lgan darslarni tanlab olganman. Kutubxonada barcha kitoblar bor, u yerda talabalar yotib qolib bo'lsa ham kitob o'qishadi. Har bir talaba uchun internet va boshqa zarur texnologiyalar mavjud. Masalan, menga kutubxonadan tomonidan elektron kitob o'qishim uchun aypad ajratilgan. Universitet hududida nima bo'lsa barchasi tekin, faqat ID-karta yonimizda bo'lishi kerak. Darslarim soat 11:00 da tugaydi. So'ng sport zaliga boraman, u yerda devor va qoyaga tirmashish, ya'ni alpinistlikni o'rganaman. Istasam tennis xonasiga kiraman, keyin suv saroyiga boraman.

- Kelajakdagi rejalaringiz qanday?

- O'zbekistonga qaytgach o'z soham, ya'ni firmalarning hisob-kitoblari, buxgalteriya, soliqlar bilan ishlash, firma analizi va narxlash, hisob-kitobga oid barcha ishlarni bajaraman. Buning uchun menda xorij diplomi va tajribasi bo'ladi. Rejalaringimdan biri "Price Waterhouse Coopers"da ishlab, malaka oshirish.

- Sizningcha, yoshlar nega xorijda o'qishga qiziqadi?

- Birinchi bo'lib, xalqaro standartlarda sifatli ta'lim olish, do'st-tanishlar orttirish istagi bo'ladi. Masalan, men oilam tomonidan yaratilgan komfort zonadan chiqish uchun, ya'ni "otasining erkasi" bo'lishni istamaganim sabab chet elda o'qishni tanlaganman. Xalqimizda "mushofir bo'lmaguncha musulmon bo'lmaysan", degan naql bor-ku.

Tengdoshlarimning ketishiga sabab ham shunga o'xshash deb o'ylayman. Ular ham sifatli ta'lim, xalqaro bilim egalari bo'lishni xohlashadi. Maktabni tugatayotgan o'quvchilarga hozirdan chet el testlariga tayyorlanishlarini, ingliz tilini nafaqat bilishlari, uni har kuni ishlatishlarini maslahat bergan bo'lardim.

Gazeta faoliyatiga va barcha tengdoshlarimga omad tilayman. Orzu qiling va maqsadlaringizni amalga oshiring!

Saidkamolxo'ja Anvarxo'jayev ham G'arbiy Florida universitetining buxgalteriya hisobi yo'nalishida o'qishni boshlaganiga bir oy bo'ldi. Yurtimizdagi ta'lim tizimi va talabalar hayoti barchamizga ma'lum. Chet elda, asosan AQShda tahsil olish va yashash ko'pchilik yoshlarning orzusi. Keling, bugun Saidkamolxo'ja bilan suhbatimiz orqali u yerdagi hayot haqida bilib olamiz.

- O'qishga kirishingiz va imtihonlar qanday bo'lgan?


- Universitetga uning veb-sayti orqali hujjat topshirganman. Raqamlar bilan yaxshi ishlay olganim uchun shu yo'nalishni tanladim. Biznesdagi xatolarini topishga qiziqqanim ham bunga sabab bo'ldi. O'qishga kirish jarayonida eng kerakli bo'ladigan imtihonlardan biri bu - SAT. Ushbu test o'quvchining kritik fikrlashi, o'qib tushunishi va matematik bilimlarini sinaydi. Shu testni topshirdim va 1600 ballik shkaladan 1400 ball oldim. Insho ham yozdim. 50 ta shtatdan aynan Floridani tanlashimdan maqsad - bu yer issiq va yashash uchun qulay.

- Bizda kontrakt va talabalar turar joyi bilan bog'liq muammo ko'p uchraydi. U yerda bu tizim qanday?

- Bu yerda bir yillik kontrakt 15 ming AQSh dollari. Lekin imtihonda yuqori ball to'plaganim uchun 600 dollar to'ladim. Yotoqxonalarda esa juda qulay, xuddi bir xonali uydek, ikki kishi yashaydi. Har bir xona uchun alohida oshxona bor. Uning to'lovi ham oyiga 600 dollar.

- Ta'lim tizimi-chi?

- AQShda ta'lim juda sifatli, barcha sharoitlar talabalarning katta yutuqlarga erishishi uchun yaratilgan. Florida universitetlarining farqi shundaki, bo'lajak talabalar dunyoning qay burchagidagi maktabni tamomlaganiga qaramasdan SATsiz o'qishga kira olmaydi. Hech kim sizga dars qilish kerakligi haqida aytmaydi, o'zingiz angllashingiz va vazifalarni vaqtda topshirishingiz kerak. O'qituvchi 1 soat dars o'tadi, darsni tushunmay qolsangiz, magistrlar yordam beradi.



SARVINOZ 10 TA TIL O'RGANDI

Sarvinoz SAYDULLAYEVA:

XIX

asr oxiri XX asr boshlarida yashab, ijod qilgan o'zbekning

ma'rifatparvar shoiri Avaz O'tar shunday yozadi:

Har tilni biluv emdi bani odama jondur,

Til vositayi robitayi olamiyondur.

Til bilish har qanday zamonda ham muhim hisoblanib, u doimo boshqa xalqlar bilan yaqinlashish, ular bilan samarali aloqalarni tashkil etish uchun ko'prik vazifasini bajargan. Buni yaxshi anglagan bugungi yoshlarimiz 2-3 ta tilni o'rganishmoqda. **Polyglot qahramonimiz Sarvinoz Saydullayeva 10 ta - rus, ingliz, fransuz, nemis, koreys, arab, ispan, turk, xitoy, italyan tillarida so'zlasha oladi.** U 23 yoshda bo'lishiga qaramay, til o'rganish va o'rgatish bo'yicha katta tajribaga ega.

Xo'sh, u bunday muvaffaqiyatga qanday erishdi?

- Bolaligimdan dutor chalib qo'shiq aytar edim. Keyin qiziqishlarim o'zgarib, til o'rganish sevimli mashg'ulotimga aylandi. Biroq hech qachon o'qituvchi bo'laman deb o'ylamaganman. Hozir esa Toshkent shahrida joylashgan o'zim tashkil qilgan "Sarvarovna til maktabi" o'quv markazida 10 nafardan ortiq o'qituvchilar bilan birga yoshlarga ta'lim berib kelyapmiz.

Menga "shuncha tilni qanday o'rganyapsiz, qiyin emasmi?" kabi savollarni ko'p berishadi. Agar xorijiy tillarni o'rganishni chin dildan xohlasangiz, bu juda ham oson. Bugungi kunda nafaqat chet tili, balki boshqa bilimlarni ham uyda o'tirib, ijtimoiy tarmoqlar orqali bemalol o'rganish mumkin. Buning uchun bizga zamonaviy telefon va internetning mavjudligi yetarli. Mening boshqa-



darajaga erishish mumkin. O'zim tuzib chiqqan dastur bo'yicha ham ingliz tili grammatikasini 3 ta darsda o'rganib chiqish imkoni mavjud.

Bugun o'z yo'nalishim bo'yicha ma'lum darajada tajribaga ega bo'ldim. Tajribalarim shuni ko'rsatadiki, aslida hech kim xotirasini past bo'lmaydi yoki sekin qabul qilmaydi (agar miyasida nuqsoni bo'lmasa). Shunchaki, biz dangkasalik olamini tark etib, qo'rquv qobig'idan qutulishimiz kerak. Buning uchun esa maqsadlarimizni aniq qilib olishimiz, o'zimizga ishonishimiz, yo'limizda uchragan to'siqlardan mardonavor o'ta olishimiz lozim.

Kelajakda faoliyatimni yanayam kengaytirib, xususiy bog'cha, maktab va universitet ochish niyatidaman va u yerda ta'lim oladigan o'quvchilar katta yutuqlarga erishishi uchun bor imkoniyatimni ishga solaman.

lardan ajralib turadigan alohida jihatim yo'q. Agar siz polyglot bo'lishga ahd qilib hozirdan harakatni boshlasangiz, ko'zlagan maqsadingizga yetasiz. Buning uchun tinimsiz mehnat va harakat kerak, xolos.

Gohida ko'cha-ko'ya "3 oyda IELTS dan 7+ olish" haqidagi reklamalarda ko'zimiz tushadi. Tajribamdan kelib chiqib aytishim mumkinki, 3 oyda 0 darajadan 7+

SIZ TALABA BO‘LDINGIZ!

Ziyoda RAHIMBOYEVA
tayyorladi

Yillar davomida qilingan mehnat o‘z natijasini ko‘rsatdi – siz talaba bo‘ldingiz! Quvonchingizga sherikmiz. Ulkan maqsadlar bilan boshlangan hayotingizning yana bir sahifasi ochildi. Endilikda yelkangizdagi mas‘uliyat hissi yana bir karra oshadi, agarda buni his eta olsangiz!

Maqsadlari sari jiddiy bel bog‘lagan tengdoshlarimizga yaxshi ma‘lumki, talabalik faqat chiroyli kiyinish, o‘quv auditoriyalarida dars o‘tish, har kuni oliy ta‘lim muassasasiga borib kelishdan iborat emas. Maqsadlaringiz sari yana bir qadam qolganini his etishning o‘ziyoq sizni sergaklikka chorlashi aniq.

Quyida siz, aziz yosh talabalar uchun kichik yo‘riqnomat tayyorladik. Buni oliy ta‘lim muassasasini bitirgan yoki bitirish arafasida turgan aka-opalaringizdan bir tuha deb qabul qilsangiz ham bo‘ladi. Qoidalar hamma yerda bo‘ladi, ularga amal qilish bilan birga o‘z-o‘zingizga taqiqlar qo‘ymaslikni o‘rganishingiz kerak!

"Tajriba"lardan kelib chiqib tuzilgan bu kichik ro‘yxatda siz qilishingiz kerak yoki, aksincha, kerak bo‘lmagan ishlar keltirilgan.

AVVAL SALOM...

Sizdan eng kamida 15 yosh katta yoki onangiz tengi inson bo‘lishi shart emas, tasodifan uchrashib qolgan-da to‘liq va yoqimli ovoz bilan salom berib, oilangizda olgan tarbiyangizni ko‘rsatgan bo‘lasiz. Siz bilan suhbatlashgan odamning kayfiyati a‘lo darajaga ko‘tariladi. Sizdan bir necha yosh kichik kursdoshingizga chiroyli salom berishingiz oqizlik emas, balki olijanoblikning belgisidir!



MUHIM EMAS, LEKIN KERAK

Jahondagi shartnoma puli qimmat, ta‘lim tizimi o‘ta qat‘iy qoidalariga asoslangan, ammo sifat jihatdan dunyoda nufuzli hisoblanadigan, har bir talabaning yuragidagi so‘nmas orzusi bo‘lgan – Garvard, Stenford, Kembrij, Oksford kabi universitetlarda talabalarning darsda qanday kiyimda ishtirok etishlari 0 foiz ahamiyatga ega. Muhimi, kiyimning qaysi brenddan ekani, uzun-kalta, keng-torligi emas, uni kiyib yurgan talabaning qanday ta‘lim olayotgani deb hisoblashadi. "Amerika ovozi" nashri jurnalisti Navbahor Imomova o‘z lavhalaridan birida ta’kidlashicha, qimmat kontrakt, mustaqil hayot kechirishdagi

qiyinchiliklar sabab AQSh universitetlarida tahsil oluvchi talabalarning aksariyati o‘zlarining eski yoki arzon kiyimlaridan uyalishmaydi.

Talaba o‘zi uchun qulay, yengil kiyimda bo‘lsagina, darslarni yaxshi o‘zlashtiradi, o‘zini erkin tuta oladi. Ammo bu chegaradan chiqish uchun sabab bo‘lmagligi kerak. "Milliy mentalitet" tushunchasi o‘z nomi bilan bizning kimligimizdan darak berib turadi. Oliy ta‘lim muassasasi siz uchun "podium" yoki yaqinlar davrasidagi shodiyonalarni o‘tadigan bayramona klub emasligini ham unutmang. Bu bilan universitetda kiyinish axloqiga rioya qilish kerakligini yana bir bor eslatishdan yiroqmiz, bu ko‘nikma sizda allaqachon, bog‘cha tarbiyalanuvchisi ekanligingizdayoq shakllanib bo‘lganiga aminmiz!

MUHIT VA ME‘YOR

Donishmandlar "To‘rtta ahmoq bilan do‘stlashsang, sen beshinchisiga aylanasan!" deb bejiz ta’kidlashmagan. Atrofingizdagi muhitni atrofingizga yig‘ilganlar belgilashga qodirli-gini unutmang! Albatta, do‘stlar davrasida vaqt o‘tkazish, qiyin vaziyatda yordam qo‘lini cho‘zish, maslahat berish, quvonchli kunlarda shodligiga sherik bo‘lish juda yaxshi. Ammo me‘yorga amal qilish muhim. Sevimli do‘stlaringizni kutubxonada dars qilishga yoki tabiat qo‘ynida kitob mutolaa o‘qishga taklif etish bilan o‘zingizga ham, ularga ham yordam bergan bo‘lasiz!

SAJ’

Nurmuhammad RAQIBBOYEV

Saj’ (arabcha – qumri, bulbul, to‘tilarning sayrashi) – badiiy so‘z san‘atlaridan biri, uni nasrdagi she‘r deyish ham mumkin. Bir yoki bir necha gapdagi ayrim so‘zlarning vazn yoki raviyda (yoki har ikkalasida) mos kelishi bo‘lib, saj’ san‘ati dastlab xalq og‘zaki ijodida paydo bo‘lgan, keyinchalik yozma adabiyotga o‘tgan:

"Baxmal o‘tovda chimildiq tutib, kuyov navkarlari bilan kuyovni kirgizmoqchi bo‘lib, bir necha xotinalar "kampir o‘ldi" bo‘lib, o‘lganiga bir nima olib, "it irillar" degan rasmni qilib, bunda ham bir nima berib, har zamon salom solib, uydan ichkari kirib... kuyov navkarlarga to‘ppi, ro‘mol, sarpyolar berib, kuyov navkarlar chiqib ketdi..." ("Alpomish")

Saj’ o‘zbek xalq ertaklari, doston va maqollarda ko‘p uchraydi. Sajlangan matn ravon o‘qiladi, ohangdorlik va kuchli emotsionallik tug‘diradi, kishi xotirasida mustahkam saqlanib qoladi. Ushbu san‘at ishlatilgan nasr – nasri musajja‘, nazm esa nazmi musajja‘ deb yuritiladi. Saj’ tuzilishi jihatidan uch ul bo‘ladi:

1. To‘liq (mutavoziy) – bir yoki bir necha gapdagi ayrim so‘zlar vaznda hamda raviyda mos bo‘ladi. Masalan, "Jalldolar so‘yib qo‘ymasin, tez-roq borib kulidan **olinglar**, zindonga **solinglar**" ("Ravshan").

2. Qo‘fiyal (mutarraf) – bir yoki bir necha gapdagi ayrim so‘zlar raviyda mos bo‘lib, vaznda teng bo‘lmaydi: "Zoti **bemadoro**, dimog‘i **po‘lod** va ko‘ngli **xoro**" ("Mahbub ul-qulub").

3. Vazndosh (mutavozin) – bir yoki bir necha gapdagi ayrim so‘zlar hamvazn bo‘lib, raviyda mos bo‘lmaydi. Masalan, "Avbosh va areol **musulmonlaridin alarg‘a ne maosh** va **ne hisof**" ("Mahbub ul-qulub").

Saj’ sho‘hlarning saroy yozishmalari, tarixiy, ilmiy va badiiy nasrda ham qo‘llanilgan. Mumtoz adabiyotda Navoiy, Bobur, Gulxaniy kabi so‘z san‘atkorlari bu badiiy san‘atdan unumli foydalanagan. Navoiy o‘zbek nasrida saj’ san‘atini eng yuqori cho‘qqiga ko‘taradi. Hamza, Abdulla Qodiriy, G‘afur G‘ulom, Oybek, Tog‘ay Murod va boshqalar ijodida ham ushbu san‘at namunalarini bor.

PUL BIRLIGI

An'anaga muvofiq, "Bilarmidingiz?" loyihasining har sonida yangiliklarga boy, siz tanish, ammo u qadar ko'p ma'lumotga ega bo'lmagan mavzular haqida batafsil, ishonchli va qiziqarli ma'lumotlarni taqdim etib boryapmiz. Bu ma'lumotlar chegaralanmagan doirada – texnika, tibbiyot, san'at, mashina rusumi yoki me'morchilik obidasi haqida bo'lishi ham mumkin. Loyihaning navbatdagi sonida aziz mushitariylarning takliflaridan kelib chiqib pul birligi, ya'ni kupyuralarni tanladik.

Loyiha muallifi: Ziyoda RAHIMBOYEVA

Pul birligi – bu ma'lum bir mamlakatda qonun yo'li bilan joriy etilgan, mamlakat iqtisodiy tizimida katta rol o'ynovchi asosiy unsur bo'lgan hisob-kitob birligidir. Iqtisodchilarning ta'kidlashicha, pul o'z tabiatiga ko'ra 3 xil xususiyatga ega: hamma narsaga ayirboshlanadigan muhim xarid vositasi, boyluk timsoli, mehnatni qiymat shaklida o'lchab beradigan vosita.

lat korxonasi bosilmoqda. Milliy pul birligimizning o'ziga xos dizayniga e'tibor bersangiz, asosan qadimiy naqshlar-u yurtimizdagi osori-atiqalar tasviriga urg'u berilgan.

Bugun biz, yoshlar faqat muzeylar yoki oilaviy kolleksiyalarda ko'rishimiz mumkin bo'lgan "iste'fo"dagi kupyuralar: 1 so'mlikning orqa tarafida Toshkent shahridagi Alisher Navoiy nomidagi Davlat



BIZDA SO'M, BOSHQALARDA-CHI?

Vatanimiz mustaqillikka erishganidan uch yil o'tib muomalaga kiritilgan milliy valyutamiz – so'm respublikaning barcha hududida yagona to'lov vositasi sifatida amal qiladi. 1994-yilda muomalaga kiritilgan 100 so'mgacha bo'lgan jami qog'oz pullar dastlab Germaniyaning "Giesecke & Devrient" firmasida chop etilgan. 1997-yili muomalaga kiritilgan 200 so'mlikdan boshlab keyingi barcha kupyuralar Toshkentdagi "Davlat belgisi" DICHB dav-



Tajikistonda somoni va Qozog'istonda tengge. Viqor to'kib turgan qorli tog'lar qarshisidagi mag'rur qoplon tasviri tushirilgan 10 ming tengelik kupyura Qozog'istonda 2003-yildan buyon zarb qilinadi. Ushbu kupyura "The Telegraph" nashri tomonidan tuzib chiqilgan dunyoning o'ziga xos ko'rinishiga ega eng chiroyli pul birliklari 15 taligida birinchi o'ringa munosib topilgan.

Venesuela (pul birligi – bolivar) Eron (tuman), Veytnam (dong), Indoneziya (rupiy), Sierra (leone) kabi davlatlarning milliy valyutasi esa bugungi kundagi eng qadrsiz, ya'ni katta inflatsiyaga uchragan pul birligi hisoblanadi.

Ma'lumot uchun: inflatsiya lotinchadan olingan so'z bo'lib, "shishish", "bo'tish", "ko'tarilish" degan ma'nolarni anglatadi. Bu xalq tilida "pulning qadrsizlanishi"dir. Tovar va pul muvozanatining buzilishi natijasida muomalada xo'jalik aylanmasi ehtiyojlaridan ortiq darajada qog'oz pullar miqdorining ko'payib ketishi, pul massasining tovarlar massasidan ustunligi natijasida tovar bilan ta'minlanmagan pullarning paydo bo'lishi mamlakatda inflatsiya yuz berayotganidan darak beradi. Inflatsiya nafaqat qo'laq davlatlar, balki o'tish davridagi va hatto eng rivojlangan mamlakatlarda ham tez-tez kuzatilib turadi.

Navbatdagi sonlarda qaysi mavzudagi qiziqarli ma'lumotlarni bilib olishni istaysiz? Fikr-mulohaza, takliflaringizni @YO_tahririyati_bot manziliga yo'llashingiz mumkin.

“

1994-YILDA MUOMALAGA KIRITILGAN 100 SO'MGACHA BO'LGAN JAMI QOG'OZ PULLAR DASTLAB GERMANIYANING "GIESECKE & DEVRIENT" FIRMASIDA CHOP ETILGAN.



akademik katta teatri, 3 so'mlikda Buxorodagi Chashmayi Ayyub maqbarasi, 5 so'mlikda O'zbekiston milliy bog'idagi Alisher Navoiy sharafiga o'rnatilgan haykal va me'moriy kompozitsiya, 10 so'mlikda Samarqanddagi Go'ri Amir maqbarasi, 25 so'mlikda "Shohi Zinda" tarixiy-me'moriy ansambli, 50 so'mlikda Registon tarixiy-me'moriy ansambli hamda 100 so'mlikda Xalqlar do'stligi san'at saroyi tasvirlangan.

15-iyuldan muomalaga chiqarilgan banknota – 200 000 so'm bugungi kunda mamlakatimizdagi eng yirik pul birligidir. Mazkur banknotaning ajoyib dizayni Buyuk ipak yo'li hamda Farg'ona vodiysining qadimiy tarixiga bag'ishlangan.

Bugunga kelib dunyoda eng ko'p ishlatiladigan pul birliklari ro'yxatida birinchi o'rinni 25 ta davlat foydalanadigan yevro, 2-o'rinni AQSh dollari, 3-o'rinni G'arbiy Afrika dollari band etmoqda. Chegaradosh Osiyo respublikalarida ham alohida pul birliklari mavjud: Qirg'izistonda som, Afg'onistonda afg'oni, Turkmanistonda manat,

YOSHLAR OVOZI

Bosh muharrir:
Hamza ABDULLAYEV

Muassis:
O'zbekiston yoshlar ittifoqi
Markaziy Kengashi

Bosh hamkor:
O'zbekiston Respublikasi
Yoshlar ishlari agentligi

Navbatchi muharrir:
Sardor SA'DULLAYEV

Musahihlar:
Rashid XO'JAMOV,
Qirmizoy HAKIMOVA

Gazeta O'zbekiston Respublikasi Prezidenti Administratsiyasi huzuridagi Axborot va ommaviy kommunikatsiyalar agentligida 2020-yil 11-dekabrda № 0242 raqami bilan qayta ro'yxatdan o'tgan. Gazeta materiallari tahririyat kompyuter markazida terildi va shiliftlandi. Tahririyat manzili: 101003, Toshkent, Matbuotchilar ko'chasi, 32. Telefonlar: (7) 233-22-16, (7) 236-79-95.

"Shara" nashriyot-matbaa aksiyadorlik kompaniyasi boshqaruvchisi, A-3 formatda chop etildi. Hajmi – 2 boshqa tobaq Korxonasi manzili: Buyuk Turan ko'chasi, 41. Indeksler: 203, 3203. Bahosi kelishilgan narxda. Buyurtma o-955, Adadi – 10525. Bosishga topshirish vaqti – 21.00. Topshirildi – 20.00

Saytimga o'tish uchun QR-kodni telefoningiz orqali skaner qiling.

